

---

## КОНСТИТУЦИЯВИЙ ҚОНУН ЛОЙИҲАСИ МУҲОКАМАСИДА ФАРҒОНАЛИКЛАР ҲАМ ФАОЛ ИШТИРОК ЭТИШМОҚДА

Бугун, 25 июндан бошлаб 5 июль кунига қадар “Ўзбекистон Республикасининг Конституциясига ўзгартиш ва қўшимчалар киритиш тўғрисида”ги Ўзбекистон Республикасининг Конституциявий қонуни лойиҳасининг умумхалқ муҳокамасига старт берилди.

Шу муносабат билан вилоят ҳокимлигининг кичик мажлислар залида Олий Мажлис Қонунчилик палатаси депутати Умиджон Жабборов, вилоят ҳокими ўринбосарлари, котибият мудирлари ва мутахассислар иштирокида очиқ мулоқот ташкил этилди.

Унда биринчи ўқишда қабул қилинган конституциявий қонун лойиҳаси ҳақида атрофлича маълумот берилди. Таъкидландики, конституциявий қонун лойиҳаси Бош қомусимизнинг 64 та моддасига 200 дан ортиқ ўзгартишлар киритишни назарда тутди. Бундан ташқари, 6 та янги модда билан 16 та янги норма киритилмоқда.

Хусусан, инсоннинг ҳуқуқ ва эркинликлари, тадбиркорлик ва ерга оид масалалар, оила, меҳнат муносабатлари, суд-ҳуқуқ соҳаси, таълим, тиббиёт, экология ва бошқа кўплаб йўналишларда таклиф этилаётган ўзгартиришлар, уларнинг ўртага ташланиши сабаблари атрофлича таҳлил қилинди. Ушбу конституциявий ислохотларнинг бош замирида инсон қадри мужассам экани таъкидланди.

Фарғоналиклар ҳам янги Конституция лойиҳасини ишлаб чиқиш жараёнларида ўз таклифлари билан ташаббускор бўлаётгани алоҳида эътироф этилди.

Тадбирда конституциявий қонун лойиҳаси юзасидан иштирокчилар ўз фикр-мулоҳазаларини билдиришди. Жойларда аҳоли билан бўлган мулоқотларда ҳам фуқароларга конституциявий қонун лойиҳаси ҳақида маълумотлар бериб бориш, уларни янада ижтимоий фаолликка чорлашда муҳим аҳамият касб этиши таъкидланди.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-06-25 19:24:18